

UCAPAN PERDANA MENTERI DI MAJLIS PERASMIAN KOMPLEKS TUN ABDUL RAZAK, JOHOR BAHRU PADA 11 MAC, 1979.

Assalamualaikum Warahmatullahi Wabarakatuh.

Yang Amat Berbahagia Tun Hajjah Rahah, Yang Amat Berhormat Tan Sri Dato Haji Othman Saat, Menteri Besar Johor, Yang Berhormat Dato Speaker Dewan Undangan Negeri Johor, Yang Berusaha Dato Haji Basir Ismail, Pengurus Besar Perbadanan Kemajuan Ekonomi Negeri Johor, Yang Berhormat Menteri-Menteri dan Timbalan-Timbalan Menteri, Yang Berhormat Ahli-Ahli Exco Negeri Johor, para hadirin yang dihormati sekalian.

Upacara pagi ini amatlah besar maknanya kepada kita semua terutama kepada keluarga Allahyarham Tun Razak sendiri serta sahabat-handai dan rakan-rakan seperjuangannya. Kebetulannya pula, hari ini ialah hari lahir perwira negara yang kita kasihi itu, yang telah secara tiba-tiba pergi meninggalkan kita, tiga tahun yang lalu, kerana menyahut seruan Ilahi.

Bangunan yang tersergam tinggi ini, melambangkan semangatnya yang tetap hidup menyala, yang sentiasa disemarak dan dimuliakan oleh setiap mereka yang cinta kepadanya. Saya mengucapkan berbilang terima kasih serta setinggi-tinggi penghargaan kepada Kerajaan Negeri Johor, dan Perbadanan Kemajuan Ekonomi Negeri Johor, khususnya kepada Yang Amat Berhormat Tan Sri Dato Haji Othman Saat, di atas kemurahan hati dan ingatan sucinya untuk mengabadikan Kompleks Membelbelah ini kepada Allahyarham Tun Razak. Sesungguhnya, ini adalah satu hadiah sumbangan harijadi yang tidak ternilai sebagai mendokong cita-cita Dasar Ekonomi Baru yang mana Allahyarham sendiri adalah penciptanya.

Sebagai salah seorang yang telah menerima warisan Allahyarham itu, saya bersyukur kehadiran Allah Subhanahu Wataala kerana dapat bersama-sama menyertai dalam upacara yang gemilang lagi bersejarah ini. Saya sekali lagi mengucapkan terima kasih serta setinggi-tinggi penghargaan kepada Kerajaan Negeri Johor dan Perbadanan Kemajuan Ekonomi Negeri Johor khususnya kepada Yang Amat Berhormat Tan Sri Dato Haji Othman dan Yang Berusaha Dato Haji Basir bin Ismail, kerana memberi penghormatan ini kepada saya.

Saya juga mengucapkan setinggi-tinggi tahniah kepada Perbadanan Kemajuan Ekonomi Negeri Johor yang telah berusaha sehingga berjaya membina Kompleks Tun Abdul Razak ini. Kejayaan ini adalah satu langkah yang penting ke arah mencapai cita-cita pembangunan negara dan pencapaian matlamat Dasar Ekonomi Baru. Sesungguhnya, Kompleks ini melambangkan titik kejayaan Perbadanan Kemajuan Ekonomi Negeri Johor khasnya dan juga peniaga Bumiputera 'amnya.

Tuan-tuan dan puan-puan sekalian,

Saya juga mengucapkan setinggi-tinggi terima kasih dan penghargaan kepada Yang Amat Berbahagia Tun Hajjah Rahah dan keluarganya kerana telah mengizinkan nama Allahyarham Tun Razak digunakan bagi menamakan Kompleks membelibelah ini. Kehadiran mereka di upacara ini serta penyertaan Yang Amat Berbahagia Tun Hajjah Rahah dalam perasmian Batu Peringatan Tun Abdul Razak, yang terletak di bahagian hadapan Kompleks ini, adalah dengan sendirinya satu penghormatan kepada majlis yang mulia ini. Memanglah tepat dan kena pada masanya kita semua mengingati segala jasa cemerlang dan khidmat-bakti Allahyarham itu, terutama usahanya untuk memajukan taraf ekonomi negara dan memperbaiki lagi keadaan hidup rakyat jelata. Kompleks membelibelah ini melambangkan pelaksanaan cita-cita Allahyarham Tun Razak dalam mewujudkan satu order ekonomi baru pada hari ini.

Sebagaimana kita semua sedia maklum, Kerajaan akan membina satu memorial kekal yang diberi nama Pustaka Peringatan Tun Abdul Razak di Kuantan, sebagai satu lagi usaha bagi mengingati jasa-jasa cemerlang dan khidmat bakti yang tulus ikhlas Allahyarham itu kepada rakyat dan negara. Pustaka Peringatan ini, yang sedang diusahakan oleh Arkib Negara iaitu di bawah tanggungjawab Kementerian Perumahan dan Kerajaan Tempatan, akan menempatkan segala bahan kepunyaan dan yang mengenai Allahyarham. Ianya akan menjadi satu pusat penyelidikan di mana rujukan dan pengkajian mengenai Allahyarham akan dapat dijalankan.

Sebahagian daripada bahan-bahan yang akan dilengkapkan di Pustaka Peringatan ini akan dapat dilihat di pameran khas mengenai koleksi Allahyarham yang diadakan di Kompleks ini sempena upacara ini. Pameran seperti ini amatlah sesuai benar kerana mereka yang mengunjunginya akan dapat menyaksikan sendiri kenang-kenangan yang ditinggalkan oleh Allahyarham itu.

Pembinaan Pustaka Peringatan ini sedang giat diselenggarakan. Kerajaan Persekutuan akan membiayai projek ini. Sumbangan derma daripada negeri-negeri dan orang ramai, sangatlah dialu-alukan. Bagi tujuan ini satu tabung bagi Pustaka Peringatan Tun Abdul Razak telah ditubuhkan untuk menerima sumbangan-sumbangan itu. Saya menyeru kepada orang-orang perseorangan, syarikat-syarikat swasta dan para dermawan, supaya menderma kepada projek ini. Derma-derma untuk Tabung Peringatan Tun Abdul Razak ini bolehlah dikirimkan kepada Arkib Negara, Jalan Sultan, Petaling Jaya. Semua sumbangan akan dikecualikan daripada bayaran cukai pendapatan.

Tuan-tuan dan puan-puan sekalian,

Seperti yang terbukti dengan pembinaan Kompleks membelibelah Tun Abdul Razak ini, Kerajaan sentiasa mengambil perhatian berat terhadap perkembangan perniagaan kecil, terutamanya dalam usaha mewujudkan lebih ramai lagi peniaga kecil bumiputera. Berbagai kemudahan dan peluang telah disediakan oleh Kerajaan serta oleh bank dan pertubuhan-pertubuhan kewangan bagi membantu peniaga-peniaga dan usahawan bumiputera. Kaum bumiputera hendaklah berani menjalankan kegiatan perniagaan dan perusahaan mereka dalam amalan perdagangan bebas di negeri ini, jika mereka hendak maju dalam bidang ini. Mereka juga mesti berani menghadapi segala penentangan dan persaingan hebat dari peniaga dan usahawan bukan bumiputera yang telahpun "established".

Kerajaan memang menggalakkan persaingan yang sihat di kalangan peniaga dan pengusaha bumiputera dan bukan bumiputera. Hanya dengan cara ini sahajalah peniaga dan pengusaha bumiputera boleh mempelajari selok-belok perniagaan dan perusahaan. Pengalaman seperti ini amatlah berguna bagi mengukuhkan kedudukan mereka dan seterusnya meluaskan kegiatan mereka dalam bidang ini.

Tuan-tuan dan puan-puan sekalian,

Bagi kaum bumiputera yang baru berkecimpung dalam bidang perniagaan dan perdagangan menghadapi tentangan dan saingan dari peniaga yang "established" dan pengusaha, memanglah bukan satu perkara yang mudah diatasi. Ia memerlukan ketabahan hati, keyakinan dan usaha yang jujur lagi bersungguh-sungguh serta memerlukan jangka masa yang panjang bagi mengatasi cabaran ini. Kaum bumiputera yang memilih bidang ini hendaklah benar-benar memahami hakikat ini. Sesungguhnya, memang tidak ada lain jalan yang lebih mudah lagi dari

apa yang telah saya gambarkan sebentar tadi Walau bagaimana pun mereka tidak harus berasa kecewa jika gagal dan sebaliknya hendaklah tekun dan rajin berusaha, sehingga mencapai kejayaan. Kerajaan berkewajipan (committed) membantu kaum bumiputera yang benar-benar cenderung dan berminat dalam bidang ini, supaya matlamat menyusun semula masyarakat Malaysia sebagaimana yang dimaksudkan dalam Dasar Ekonomi Baru itu, akhirnya tercapai.

Bagi membantu Kerajaan mencapai hasrat dan cita-cita ini dalam jangkamasa yang ditetapkan, usaha-usaha yang lebih berkesan hendaklah dibuktikan dengan secara jujur dan ikhlas oleh kaum-kaum bukan bumiputera terutama peniaga-peniaga dan pengusaha yang sudah "established". Dengan seberapa yang boleh, mereka hendaklah memberikan tunjuk-ajar, bimbingan dan panduan atau bantuan sekalipun, jika diperlukan kepada peniaga dan pengusaha bumiputera ini. Semangat dan kerjasama seperti ini akan dapat mewujudkan persefahaman dan muhibbah. Inilah juga sebaik-baik jalan bagi mempercepatkan lagi usaha kerajaan menyusun semula masyarakat ini.

Saya sendiri masih belum puashati lagi dengan setengah pengusaha swasta yang tidak menghiraukan langsung cita-cita kita untuk menyusun semula masyarakat di bandar-bandar. Masih banyak lagi pemaju yang tidak memberi peluang kepada peniaga bumiputera mendapatkan ruang perniagaan di kompleks membelibelah atau kedai-kedai yang mereka binakan dengan alasan bahawa tidak ada peniaga bumiputera yang sanggup menyewa atau membeli ruang perniagaan yang mereka majukan.

Apa yang sebenarnya berlaku ialah terdapat usaha-usaha kurang sihat yang sengaja diadakan bagi mewujudkan suatu keadaan yang boleh menyusah atau menghalang peniaga bumiputera menjalankan kegiatan mereka. Umpamanya, peniaga bumiputera terpaksa mendapatkan barang perniagaan mereka daripada orang tengah bukan bumiputera dengan tujuan mengawal sistem harga jualan runcit. Pemborong-pemborong bukan bumiputera kadang kala mengenakan harga yang lebih tinggi kepada peniaga runcit bumiputera. Keadaan ini menyebabkan peniaga kecil bumiputera tidak dapat menawarkan harga yang bersaing (competitive) oleh kerana mereka terpaksa menjamin keuntungan yang menasabah bagi membayar wang sewa kedai dan sebagainya.

Tetapi sebaliknya peniaga bukan bumiputera boleh menawarkan harga yang lebih menarik terhadap barang-barang perdagangan mereka.

Ini sudah tentu akan merosakkan segala perkiraan peniaga kecil bumiputera yang terpaksa menghadapi pergolakan "survival" dalam dunia perniagaan bebas. Oleh sebab itu, mereka yang benar-benar ikhlas terhadap penyusunan semula masyarakat dengan tujuan mewujudkan perpaduan yang kukuh dan berkekalan di kalangan rakyat berbilang kaum, mestilah menimbangakan dengan serius hal ini dan seterusnya memberhentikan segala perbuatan yang tidak sihat atau penganiayaan.

Tuan-tuan dan puan-puan sekalian.

Berbalik kita kepada Kompleks ini, setiap peniaga yang telah bernasib baik mendapat tempat, hendaklah menjalankan perniagaan mereka dengan tekun dan rajin supaya cita-cita kita untuk membangunkan satu masyarakat peniaga bumiputera akan dapat dijayakan. Kepada peniaga-peniaga bukan bumiputera di Kompleks ini, saya berharap akan dapat bekerjasama dan memberi bantuan kepada peniaga bumiputera yang pada keseluruhannya belum lagi mempunyai banyak pengalaman dalam bidang ini. Kerjasama dan semangat bantu-membantu ini akan dapat memberi kejayaan yang lebih besar lagi kepada kedua-dua pihak. Sesungguhnya ia adalah sumbangan yang berfaedah dalam usaha kerajaan mencapai cita-cita Dasar Ekonomi Baru.

Memanglah sudah menjadi adat resam dunia bagi tiap-tiap peniaga berlumba-lumba untuk mendapat keuntungan yang lumayan. Tujuan utama kita membawa peniaga bumiputera dan bukan bumiputera di bawah satu bumbung ini, ialah untuk memberi peluang kepada tiap-tiap peniaga supaya dapat memupuk sifat toleransi dan sentiasa bekerjasama antara satu sama lain. Saya berharap peniaga-peniaga di kompleks ini akan dapat memenuhi hasrat dan cita-cita mulia ini. Saya menggesa setiap peniaga dan pengusaha yang menggunakan ruang Kompleks Tun Abdul Razak ini supaya mendukung semangat dan cita-cita pencipta Dasar Ekonomi Baru kerajaan.

Tuan-tuan dan puan-puan sekalian,

Saya gembira mendapat tahu bahawa di samping membina kompleks-kompleks membelibelah yang besar, seperti yang akan dirasmikan ini, Kerajaan Negeri Johor, melalui Perbadanan Kemajuan Ekonomi Negeri Johor serta dengan kerjasama Pejabat Kemajuan Negeri dan Majlis Perbandaran Johor Bahru, sedang menyelenggarakan dua projek yang lain di Johor Bahru ini juga, bagi faedah peniaga-peniaga kecil.

Pertama, kawasan simpan kereta yang terletak di antara Kompleks Tun Abdul Razak dan Pasar Besar, akan dijadikan kawasan perniagaan

pada waktu malam. Antara 60 hingga 70 orang peniaga kecil akan mendapat peluang berniaga apabila projek ini siap kelak. Kedua, kawasan perniagaan makanan dan minuman di Jalan Sekudai, yang berhampiran dengan Hospital Besar, akan dipereelok dan dilengkapkan lagi dengan kemudahan-kemudahan yang perlu, supaya menjadi kawasan jualan yang baik dan menarik.

Sesungguhnya, kejayaan Perbadanan Kemajuan Ekonomi Negeri Johor selama lapan tahun setengah ini, seperti yang dinyatakan oleh Yang Amat Berhormat Tan Sri Dato Haji Othman Saat tadi, amatlah memuaskan. Saya harap, Perbadanan ini akan terus bergerak dengan lebih giat lagi bagi membangunkan Negeri Johor seluruhnya. Ia harus memainkan peranannya sebagai alat bagi mencapai cita-cita Dasar Ekonomi Baru. Usaha Perbadanan ini untuk memindahkan saham yang dipegangnya kepada bumiputera melalui satu tabung pelaburan merupakan satu langkah yang baik dan sewajarnya diberi sokongan dan sambutan.

Akhirnya, saya sekali lagi mengucapkan berbilang terima kasih serta setinggi-tinggi penghargaan kepada semua pihak yang telah bersama-sama menjayakan pembinaan, seterusnya perasmian Kompleks Tun Abdul Razak ini, dan bersama-sama memberikan bantuan bagi menjayakan dua upacara yang lain, yang akan dijalankan sebentar lagi di Kompleks ini. Saya berdoa kehadiran Tuhan Yang Maha Berkuasa supaya diberi perlindungan kepada setiap orang yang menggunakan Kompleks ini, serta diberi kemudahan dan keuntungan kepada mereka yang menjalankan perniagaan di bangunan ini.

Tuan-tuan dan puan-puan sekalian,

Dengan ini, saya dengan amat sukacitanya merasmikan pembukaan Kompleks Membelilah Tun Abdul Razak.

Terima kasih.